


重修涪州志

卷九
之年



重修涪州志卷九

人物志

孝友

忠烈

孝友

崇祀忠義孝友祠者十二人

明夏正貢生夏道碩傳曰夏公諱正號赤溪居鶴鳳灘之濱歲未週遭父邦本喪母陳氏年甫廿矢志育之五齡間母曰父何在母語之曰汝父五年前浴於江死矣正卽哭仆地暈絕稍甦復問母曰江何處母遙指其處正卽騰身赴江所家人遽追抱止之曰已探得葬此山之麓豈猶在水耶正遂哭於

其麓卧地不起亦不肯歸哭不絕聲年益長讀書
遊泮娶易氏偕奉母惟謹寢食溫清不踰古禮母
有訓必跪而受命或曰此禮久不復也正曰此常
禮耳何足云孝但一日不爾則吾心如有所失如
此心何其人慚而退母嘗病醫者謂必得鹿血和
酒正日夜告天鹿不可得潛自錐其身瀝血和酒
以進母病頓愈逾月病復發正復如前錐身瀝血
病又愈久之母稍覺泣謂曰汝若再如此吾死有
餘恨正跪曰兒身未嘗痛然亦遂奉母命止家豢
雛雞以養母一日鷹攫其一正泣拜於地曰天乎

此雞以養母非自奉也須臾鷹翅翔擲雞如其
爾又於他處攫雞而擲之如是者三其誠孝所
感如此載省志子孫多登科第

周昇

表建和聖道國公祀

陵縣知縣以孝聞得旨旌

王應元力農養父父每出必候於途扶掖以歸一口
方力田父醉卧於室室忽火急奔救火熾甚身濡
泥水出而復入者三呼號烈焰中抱父死載省志
何以讓字環斗崇祀鄉賢知大名時陳情終養頃刻
不離親歿廬墓三年當事屢薦不出壽七十二勅

建懿孝名儒坊有兩都賦行世載省志

文經庠生孝行坊在宗祠之左載省志

毛宗成業農父早卒事母孝盜劫其室負母匿林中
以免母卒葬宅畔昕夕省視至老不倦載省志

國朝

周儼編修蔣士銓傳曰公諱儼字欽齋號父公別號

墨潭姓周氏系出楚之營道縣爲濂溪先生十七

世孫其世次具彝山公墓誌不復詳彝山先生公

考也諱茹茶明湖南路總兵官妣吳夫人生公及

弟儒公早慧端厚年十三通經史十五能文章天

啟間彝山公以智勇立功威名赫然遍天下國變
後僭偽紛乘亂賊四起又數從王春石師相及忠
國王公恢復數十郡縣旣而觀時審變遂解印綬
去官往侍二親於桐梓親歿返柩葬涪州時康熙
乙巳之歲也戊申公入庠甲寅滇逆僞帥遣聘使
招致總戎公總戎怒罵之儒恐激則致變請往謝
至閬中爲賊所留總戎公恚而疾公於是出奇計
挈弟遁歸總戎公霍然而起曰吾家清白不污矣
漢沔間傳公孝義者藉甚吳逆設制科士被迫脅
多往應公匿迹深隱乃奉父母避居黑塘山莊又

徙居白誌巖栖七載研究青鳥瑤瑤軒岐璞輅等
書入理尤邃庚申九月譚宏亂賊衆百餘夜薄公
室公挺戟刺其魁遽引去公與儒謀分負父母去
力怯不任彝山公曰賊且復至兒等速遁勿同殉
公抱翁泣曰今夕死耳不能以親委賊俄而賊果
來儒奮身出敵賊斫之賊乃斬扉入攢刀刺公撲
地而儒率鄰衆挾兵反攻賊爲駭竄明日儒創裂
將死公稍甦命舁榻就第枕側與訣儒號而絕母
夫人感慟成疾旋亦卒公兄弟至乾隆間始
旌其孝按史載孫恩之亂烏程潘綜扶父驃出避父老

不能行令綜走不可賊來斫髀綜抱父腹下以頭
面受四創死而復蘇後有司奏改其村曰純孝里
與此絕類第無兄弟同禍耳儒歿後公撫恤孤寡
備至歷三十年如一日目戒室人曰必善視之勿
令孀雛含痛及姪頊漸長乃分廬奴婢爲立門戶
而翼之如初於是再徙賢人鄉建陸舫小築蒔花
藥娛翁使諸郎誦讀其內庚午鄉試得舉名列第
四明年下第同年生任典謨卒旅邸公爲具棺殮
護持還里而彝山公病適劇公禱天祈減己算以
代又嘗糞爲黥驗翁病於是得遽痊歷三年然後

卒公號慟七日絕食飲鬚髮盡白形骸枯悴至性

純粹蓋如此公仁惠重然諾好施與有貸者輒焚其

券或以妻子托厯久不負於朋友親喪雖千里必

往會葬有東漢君子風義又善方書活人無算甲

申奉部檄謁選入京八月病於舟次惟一幼僕侍

乃檢行篋所著宗譜及詩文俾遺諸子遂歿時康

熙四十二年八月初五日也距生順治六年十月

十七日厯年五十有六祔葬磨沱山莊總戎公墓

次聞公讀書山中時夜有奔公者力拒之且誓不

言某姓氏婦慚感去鄉有虎患公爲文責神謂奸

凶橫行神弗誅殛乃縱虎爲虐有慚享祀越數日
虎盡噬里中大猾而隱人咸異之惟正乃格不信
然與公配徐生四子五女珣琬琪璇琪登乙酉科
令天門多治行孫十一人某某由科目出宰者四
人在庠序者五人惟珙子煌由翰林起家今官少
司馬曾孫若干登賢書者與沅興洛惟興岱亦官
翰林侍郎次子也

太史氏曰語云孝而仁者可與言忠信而勇者可
與守義公百行完美比德昔賢若全親於難則趙
咨江革牛徽也脫弟於賊則趙孝倪萌滔于恭也

臧算延親滌園嘗糞則王薦石建黔婁也髮白形
毀則邵廷煒荀文師也至如豺狼遠徙猛獸避途
則又吳達司馬嵩也而暗室弗欺端潔自守於曹
鼐陸公容有同軌焉嗟乎凡公所有者他人得一
已傳於世而公兼備焉史稱濂溪先生清明誠一
寡欲於無篤汎愛拯憂患護友喪守親墓泊然於
世公恆肖焉是乃濂溪之裔也歟

周儒字魯貞庠生事詳周儼傳中並載一統志

黃志煥康熙己丑夏五月城中火前一日志煥父卒
殯於堂火及其廬志煥負母出復入啟棺負父屍

哭烈焰出州牧董繼祺救火目覩其事詳郡守俱
額旌之

彭學鴻九歲喪父哀毀骨立後見父衣履輒泣母皮
氏病嘗糞驗休咎洎歿廬墓卒墓側旌表建坊

譚世滙父鑑病嘗糞每夜祈天願以身代父卒廬墓
三年嘉慶四年春教匪破鶴遊坪負母夏氏逃至
柴林坡猝遇賊傷肱母驚墜地滙忍痛殺賊賊不
敢近得脫母年八十二卒仍廬墓側池中紅蓮花
忽放白坊建沈家塲里許

鄧仕德父早喪事母孝及卒廬墓三年時值嚴冬墳

生三筭 旌表建坊

孝友未入祠祀者

明周廷珍甲申歲獻賊陷涪州母姬氏卧病珍負母避
亂山中母曰汝五世一綫之傳勿以我墮周氏緒
也促之數不忍去母旋卒珍躄踊無措瞥見空塋
葬母其中賊衆哭至墜層巖不死夜中緣藤下至
江澚苦無渡一叟掉舟飄然來脫之

劉奇山司諫秋佩第也司諫以言逆旨罰其私帑充
軍餉奇山鬻田宅往來窮邊備厯艱辛卒脫司諫
以歸構高樓兄弟觴詠其上以終餘年

國朝

楊維楫楊奇子甫二歲父卒事母何氏孝雍正二年
爲母請旌有冰霜映雪坊在學宮右母病日侍
湯藥衣不解帶母思食魚楫徧覓得之持歸母已
卒矣捶膺破額幾絕七日水漿不入口居喪不近
內者三年後見魚輒流涕不食

徐永珍家赤貧少喪母事父九龍孝住破窰中父嗜
酒每日傭工貰酒供父而已常乏食父卒丐棺以
葬廬墓三年

楊昌榮三歲喪母年十一父勝德歿貧無葬具典身

於楊體常家始克葬後贖回

朱之安家貧父母歿不克葬鬻身陸祖信家葬之後
贖歸

陳鵬飛幼失怙母性嚴飛怡顏承順母怒必長跪俟
解乃起及成進士宰萊蕪迎養三載母卒扶柩歸
廬墓三年仲父無子愛季父子立爲後衆姪意不
悅乃皆量給產以安之而浮議弗息飛推所得產
讓爭者衆始貼然

歐陽德煥貢生父養異姓子後生四子析產時諸弟
靳不與產德煥曲全卒均予之壯年喪妻不復娶

楊恒增生家素封代父理家政四十年無私積少時胞弟溺死聞信號啣躍入池幾殉救之免母卒不入私室者三年

冉治華父鎧家貧絕食治華年十六欲鬻身以養舅氏何田阻之貸以服賈資供菽水後小康弟兄喪葬婚嫁皆力任之嘗得重疾妻陳氏刲股療之愈何文明兄第三人母黎氏鍾愛其伯季析產時先以沃田多與之而寡與仲子文明曲順母意了無芥蒂

何其潛文明子繼母性褊急曲體承順無或拂